## CHANSON DE NOEL

SUR LE CHANT DE:

© combien est heureuse La peine de celer Une flamme amoureuse Qui faict deux cueurs brusler Dont chascun d'eulx s'attend Estre-bien tost content.

ARGUMENT SUR L'EUANGILLE

Missus est Angelus.

Luc. j.

Combien fut heureuse
La vierge quand receut
Ceste voix amoureuse
Dont tost apres conceut
Par oeuure supernel
Le filz de l'Eternel.

La puissance ineffable A monstré par effect Vng mystere admirable Quant vng corps a parfaict Parfaict en Deité, Prenant humanité.

La pucelle excellente
En ses flancs precieux
Celuy qui la regente
En terre et mer et cieulx
Et sur tout element
La porte humainement.

Doncques Marie est faicte Mere de Christ vray Dieu Et la loy est refaicte Ou rigueur n'a plus lieu; Grace par ses efforts La poulse et mect dehors.

L'Ange de hault parage Ayant auctorité Luy a faict le message Et luy a recité: Ce mot tant gracieux: Aue, Royne des Cieulx.

Aue, seulle oultrepasse

En generation
Pleine de toute grace
Ayant perfection
Dieu le veult reseruer
Et pour bien conseruer.

Luy hault seigneur et maistre Qui contient tout en soy Ta veue tant adextre Qui est espris de toy De toy prend vng baiser Se voulant appaiser.

Tu es la plus heureuse Qui fut onc et sera: Tu es fleur precieuse Dont vng fruict sortira Maulgré l'aer vicieux Fruict sur tous precieux.

La vierge humble et benigne Fut pensiue pour lors Et s'estimant indigne Fut troublée en son corps Ayant sans fiction Modeste affection. Ne doubte point Marie Mais estime combien Dieu qui tout seigneurie Te veult faire de bien: Car tu as aujourd'huy Grace trouuée en luy.

Tu as donc trouué grace Grace en don gracieux En ceste terre basse Procedante des Cieulx Et vient du Createur Sur tout dominateur.

Ta grace est souueraine Ayant tousiours vigueur: Ta grace est la fontaine Dont procede liqueur: De goust tres sauoureux Dieu en est amoureux.

Vela et sans demeure Maintenant concepueras Au temps prefix et heure, Vierge l'enfenteras: Jesus sera nommé De Dieu bien aymé.

Il aura la puissance De Dauid son affin Et tousiours ioyssance De son regne sans fin: C'est eternellement Lassus au firmament.

Comment ce peult faire Puisque homme n'ay cogneu Et que i'entends parfaire Du tout en tout mon veu, Et en integrité Garder Virginité?

Si doncques ie suis forte, Et'maintiens ce vouloir Dy moy en quelle sorte Je pourray concepuoir Et comment ce sera Que cela se fera?

L'esprit sainct immuable Nignara par dessus toy Par mystere admirable, Ainsi oultre la loy Sera par toy receu Du sainct esprit conceu.

Doncques Marie estime Non par commixtion, Mais par presence intime Ceste incarnation: Filz de toy sera faict Enfant beau et parfaict.

Tu luy es preparée Habitacle auiourd'huy Et seras obumbrée Par la vertu de luy: Telle est sa volunté Sa puissance et bonté.

Doncques Vierge amyable
Le fruict qui prouiendra
De toy tant acceptable
Vng chascun le tiendra
Tousiours et en tout lieu
Le filz aymé de Dieu.

Et mesmes ta parente Ainsi que tu as sceu En vieillesse apparente Vng Enfant a conceu, Sterille fut deuant; Foecunde est maintenant.

Son dire est infaillible
Car tout soubdain est faict.
Et rien n'est impossible
Enuers luy seul parfaict:
Entends Marie et croy
Ce qu'il te dit par moy.

Ceste oraison parfaicte,
Marie respondit:
Sa volunte soit faicte
Ainsi que tu m'as dit:
Serue suis et seray,
De luy tant que viuray.

Lors el fut obumbrée Par admiration : En elle tant aymée Print incarnation , Jesus puissant et fort Nostre seul reconfort.

Comme de sa nature Le soleil au matin Perce sans ouverture Le voirre cristalin Et ne sent fraction Aulcune ou lesion;

Tout ainsi le verbe entre Tant precieux et cher Dedans le sacré ventre Et soubdain est faict chair : Nous l'auons trestous veu Et sa gloire cogneu.

Ceste lumiere munde Et vraye a esclarcy Tout homme de ce monde Par vil peché noircy Et de ses rayons fors Met toute nuyct dehors.

O plus que heureuse mere A l'heure que tu veis La puissance du pere La puissance du fils L'ardeur du sainct Esprit Lors quel fut ton esprit? AMEN.